

Date – 12/07/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Tourism Department chuan Mizoram hmun hrang hrangah fur ruahtuiin chhiatna hrang hrang a thlen avangin zin mite chu an him zawk nan Mizoram tlawh rihlo turin an ngen.
2. Aizawl DC chuan tunhnai ruah sur nasa leh fur in tan chho ah chhiatna liantham thleng thei laka mipuite him nan sawrkar thuchhuak zawm tur leh fimkhur turin mipuite an chah.
3. Health Minister Pi Lalrinpuii'n West Bengal state hotute a kawmna ah tunhnaia Subhasgram-a Kristian te Biak In suasam a nih chungchangah theihtawpa hmalak pui turin a ngen.
4. Joint Parliamentary Committee on One Nation, One Election Chairman, Member of Parliament P.P. Chaudhary a'n One Nation, One Election chu ram economy in a hlawkpui dawn tih a sawi.

<><><>

TRAVEL ADVISORY

Tourism Department chuan Mizoram hmun hrang hrangah fur ruahtuiin chhiatna hrang hrang a thlen avangin zin mite chu an him zawk nan Mizoram tlawh rihlo turin an ngen.

Tourism Department chuan tunhnaia ruahsur avangin Mizoram hmun hrang hrangah tuilian, leimin leh chhiatna hrang hrang a thlen avangin state pawn atanga zin mite chu an him zawk nan tun dinhmunah Mizoram tlawh hrihlo turin an ngen a, buaina lian zawk thlen palh a hlauhawm avangin zin tura lo inbuatsaih tawh te pawh hun danga zin tum zawk turin an chah a ni.

Indian Meteorological Department Aizawl chuan khawchin a thlirlawk danin Mizoram hmun hrang hrangah ruah a sur chhunzawm dawn an ti a, hmun thenkhatah chuan tek tlak theihna a awm tih sawiin mipuite fimkhur turin an ngen a ni.

<><><>

OIL SUPPLY

Furpui thleng chho mekah Mizoramah tun dinhmunah tuialhthei a thleng tha rih tih Indian Oil Corporation (IOC) Limited Deputy Manager (Aizawl) Pu Z Lhungdim chuan a sawi.

Akashvani News Aizawl in a kawmnaah he thu hi sawiin Pu Z Lhungdim chuan fur ruahtui tlak tam lai ni mah se tun dinhmunah chuan tuialhthei a lo luh that pangngai thu a sawi a. Leimin hrang hrang avangin chhim lamah harsatna tlem a awm tih loh chu Silchar atanga lo kal tuialhthei phur te'n harsatna an tawh loh thu a sawi a. Khawthlang rama Strait of Hormuz dan avanga harsatna awm ve deuh thin

pawh a tlang tawh avangin tun dinhmunah harsatna han sawi tur a awm tawh loh thu a sawi a ni.

<><><>

DISASTER

Aizawl DC chuan tunhnai ruah sur nasa leh fur in tan chho ah chhiatna liantham thleng thei laka mipuite him nan sawrkar thuchhuak zawm tur leh fimkhur turin mipuite an chah.

Aizawl DC thuchhuah tarlan danin Aizawl District hmun hrang hrangah leimin, lung tla, retaining wall chim leh chhiatna thleng dangte a awm avangin veng hrang hranga Disaster Management Committee te chu mahni hmun theuhah hma la turin an hriattir a, mipuite chu fimkhur tur leh sawrkar thuchhuah ngaichang turin an ti a ni.

Thuchhuah chuan Lei min hlauhawm chu ruahtui tlak laia a tul anga khuh hul tur a ni an ti a, In tinin tui luan kawr mumal taka siam bakah Thing leh mau, thli leh ruah in a tih tluk mai theih, chenna in leh electric wire delh mai theih te chu a ram neituten Forest Department bia in a zar an kit tur a ni a, Leimin thei bulah awm hnaih loh bakah fimkhur turin mipuite an chah a ni.

<><><>

HEALTH MINISTER

Health Minister Pi Lalrinpuii’n West Bengal state hotute a kawmna ah tunhnaia Subhasgram-a Kristian te Biak In suasam a nih chungchangah theihtawpa hmalak pui turin a ngen a, India chu sakhaw zalenna ram anih angin thlamuang taka sakhaw hrang hrang betute an awm theih nana hma la turin a ngen.

Health Minister Pi Lalrinpuii hian West Bengal Health Minister thar Dr Sharadwat Mukherjee nen inkawmin hriselna kawnga India hmar chhak state hrang hrang ten tangruala hmalak ho theih dan tur leh Minister te inhmukhawm theih dan tur kawng zawn ni se an ti a, tunhnaia West Bengal, Subhasgram a Kristian te Biak In suasam a nih chungchangah theihtawp chhuaha hmalak pui turin a ngen a. India chu sakhaw zalenna ram anih angin khawi state ah pawh sakhaw hrang hrang betute thlamuang taka an awm theihna turin hemi kawngah hian state tina Sawrkar hotuten hma an lak tul a tih thu a sawi a ni.

<><><>

END

Excise & Narcotics Department chuan kuminah Heroin Kg. 15.480 an man tawh a, heng bakah hian dan phalloh thil chi hrang hrang thahnem tak an man.

Excise & Narcotics Crime Review Meeting atanga tarlan danin Excise & Narcotics Department-in kumin January atanga vawiin thlengin Heroin Kg. 15.480; Ganja Kg. 133.470; khuh damdawi um 8,213; Methamphetamine Kg. 63.804 leh Crystal meth Kg. 10.882 bakah zu bilh lai litre 75,646; a senchi litre 14,591.880; Beer litre 21,290.800; Foreign zu litre 40.400 leh BEDC litre 499.100 an man tawh a ni..

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MIZO HOCKEY PLAYER

Kumina Asian Games khel tur India hmeichhe hockey team-ah Mizo Nula pahnih Lalremsiami leh Lalthantluangi an tel a, Asian Games hi Nagoya, Japan-ah September ni 19 atanga October ni 4 chhungin khelh a ni ang.

Mizo nula pahnih Lalremsiami Hmar leh Lalthantluangi te telna India hmeichhe hockey team hi tunhnai khan FIH Hockey Women's Nations Cup ah an champion a, final-ah India hian a thlengtu ram, New Zealand chu goal hnih goal khatin an hneh a, he inkhelah hian Mizo nula Lalremsiami Hmar chu khel tha ber 'Player of the Match' atan thlan a ni a, ani hian semifinal-a Japan an hneh tum pawhin chakna goal a khung a ni.

Sports Minister Pu Lalnghinglova Hmar chuan social media-ah lawmpuina thu sawiin Japan-a Asian Games khel tur India hmeichhe hockey team-ah Mizo Nula pahnih Lalremsiami leh Lalthantluangi an tel chu a lawmpui takzet tih sawiin India Team duhsakna a hlan tih a sawi.

<><><>

MYC CHAIRMAN

MYC Chairman Pu Malsawmzuala Ralte chuan zirlaite chu mahni kea ding tura inbuatsaih a pawimawh tih sawiin rampawna hnathawh hreh lo turin a chah.

Mizoram Youth Commission in zoram pawn hmun hrang hranga lehkhah zira awm te puala buatsaih, Summer Sports 2026, Shillong MSU buatsaih a hmanpui na ah he thu hi a sawi a, MYC Chairman chuan zirlaite chu mahni kea ding tura inbuatsaiha, ngaihtuahna sen a pawimawh thu sawiin sorkar hna chu taima fal, thawkrim falte tana ban phak a ni tih sawiin rampawna zirlai awm te chu an zirna hmunah hnathawh tur remchang ngaihtuah pah zel tura chahin ramdanga hnathawh hreh lo turin a chah a ni.

<><><>

ONE ELECTION CHAIRMAN

Joint Parliamentary Committee on One Nation, One Election Chairman, Member of Parliament P. P. Chaudhary chuan nimin khan Lok Sabha leh State Assembly-a inthlanna a ruala neih chuan rorelna a tichak ang a, sum hmanna a ti tlem ang a, ram economy in a hlawkpui ang a ti.

Goa-a thuthar lakhawmtute a kawmnaah PP Chaudhary chuan, member 41 awmna committee, political party lian zawng zawng aiawhtu te hian state hrang hrang an fang kual a, sorkar, political party, constitution lam mithiam, mipuite leh mi pawimawh dangte ngaihdan lakkhawm a ni, a ti. Goa hi committee-in state a thawh 9 na a ni.

One Nation, One Election tih awmzia chu ram pumah ni khata vote thlak tihna a ni lo tih a sawi a . Lok Sabha leh Assembly inthlanna chu phase hrang hranga kalpui a ni ang a, mahse kum nga danah vawi khat chauh neih a ni ang a ti a. JPC Chairman chuan inthlanpui neih ruala neih chuan inthlan kaihnawih sum hman nawn fo leh buaina awmthei a tihlem a nih avangin economy-ah cheng vaibelchhe nuai sarih vel a belhchhah thei niin a sawi.

<><><>